



Вазирликнинг 2021 йил “3” май даги
208 -сон буйруғига 10-илова

“Ватан тараққиётига менинг ҳиссам” мавзусидаги иншолар танлови НИЗОМИ

I. Умумий қоидалар

1. Мазкур танлов Олий ва ўрта махсус таълим вазирлиги тизимида маънавий-маърифий ишларнинг янги тизимини яратиш бўйича 2021 йил биринчи ярим йиллиги учун “Йўл харитаси”нинг (2021 йил 28 январда тасдиқланган) 82-бандида белгиланган вазифалар ижросини таъминлаш мақсадида ташкил этилади.

2. “Ватан тараққиётига менинг ҳиссам” мавзусидаги танловга олий таълим муассасаларида таҳсил олаётган талабалар ўзларининг ижодий ишлари билан иштирок этади.

3. Танловнинг олий таълим муассасаси босқичларини ташкил этиш ва ўтказиш жараёни олий таълим муассасаларининг Ёшлар масалалари ва маънавий-маърифий ишлар бўйича проректор томонидан амалга оширилади.

II. Танловнинг мақсад ва вазифалари

4. Танловнинг асосий мақсади –Ўзбекистон Республикасида ёшларга оид давлат сиёсатини изчил амалга ошириш, ёшларни миллий ва умуминсоний қадриятлар руҳида тарбиялаш, истеъдодли ёшларни аниқлаш ва қўллаб-қувватлаш, миллий ўзлигимизни англаш, ёшлар онгида мустақиллик тухфа этган азиз неъмат - Ватанимиздаги бугунги тинч ва осуда ҳаёт, фаровонликни қадрига етиш, инсон манфаатлари устувор бўлган эркин демократик жамият қуриш, миллий ва диний қадриятларни тиклаш, улуғ аждодларимизнинг бебаҳо маънавий меросидан баҳраманд бўлишдек неъмат қадрига етиш ва интилувчан, сергайрат ёшларни камолга етказишдан иборат.

5. Танловнинг асосий мақсадидан келиб чиқиб, қуйидаги вазифаларни кўзда тутати:

ёшлар онгида Ватанимиз тарихи, миллий ва умуминсоний қадриятлар, ижтимоий ҳаёт ҳақидаги тушунча ва билим-кўникмаларини янада юксалтириш;

ёш авлодни ватанпарварлик руҳида баркамол этиб тарбиялаш, улар қалбида ватанга садоқат, миллий анъана ва қадриятларга ҳурмат туйғусини мустаҳкамлаш;

улуғ аждодларимизнинг бой маънавий-маданий меросини ёшлар ўртасида кенг тарғиб этиш, ёш ижодкорлар томонидан замонамиз қаҳрамонлари акс эттирилган бадиий етук, юқори савияли ижодий асарлар яратилишига эришиш;

ёшлар ўртасида илмий, ижодий ва публицистик мақолалар, иншолар ёзиш кўникмаларини шакллантириш. - ёшларимизни ҳар томонлама соғлом ва баркамол этиб тарбиялаш, ўз иқтидорларини намоён этишлари учун шарт-шароитлар яратиш ҳамда мустақил ва эркин фикрга эга истеъдодли ёшларни ҳар томонлама қўллаб-қувватлаш.

III. Танловни ўтказиш босқичи ва муддатлари

6. “Ватан тараққиётига менинг ҳиссам” мавзусидаги танлов икки босқичда ўтказилади.

Биринчи босқич – олий таълим муассасаси факультетлараро жорий йил октябрь ойининг 1-10 кунлари ўтказилади.

Иккинчи босқич (якуний) – республикадаги барча олий таълим муассасалари голиблари ўртасида октябрь ойининг 11-20 кунлари ўтказилади.

IV. Танловни ташкил этиш ва ўтказиш

7. Танловнинг биринчи босқичини ўтказиш бўйича олий таълим муассасаси ректори ва директори буйруғи билан Ишчи гуруҳи ва соҳа профессор-ўқитувчилари, олимлари, мутахассислари, жамоат ташкилотлари вакилларидан иборат таркибда Ҳакамлар ҳайъати тузилади.

8. Талабалар томонидан тайёрланган ижодий иш (иншо)лар ОТМ кесимида тузилган Ҳакамлар ҳайъати томонидан танлов шартлари ва мезонлари асосида баҳоланади.

9. Танловнинг иккинчи босқичи Олий ва ўрта махсус таълим вазирлигида ташкил этилган вазирлик Ишчи гуруҳи томонидан вазирлик ҳузуридаги “Маънавият ва маърифат” марказида ўтказилади. Танловнинг якуний босқичи ғолибларини аниқлаш бўйича Ҳакамлар ҳайъати тузилади. Ҳайъат таркибига тегишли вазирлик, идора ва ташкилотларнинг вакиллари ва соҳа бўйича етук мутахассислар жалб этилиши мумкин.

V. Танлов шартлари ва баҳолаш мезонлари

10. Танловга тақдим этиладиган иншолар қуйидаги мезонларда баҳоланади:

мавзунинг мазмун-моҳияти тўлақонли очиб берилганлиги;

ижодий иш (иншо)нинг стилистик ва грамматик жиҳатдан тўғри ёзилганлиги;

мавзунинг мазмуни ёшларни ватанпарварлик, улар қалбида ватанга садоқат, миллий анъана ва қадриятларга ҳурмат туйғусини мустаҳкамлаш, баркамол шахс этиб тарбиялашга йўналтирилган бўлиши;

мавзуни ёритишда адабиётлардан фойдаланганлик даражаси ва таҳлилий ёндашувлар;

мустикал фикрларнинг аниқ билдирилганлиги;

мавзуни ёритишга ўзига хос ижодкорлик хусусиятлари ифода этилганлиги.

11. Иншо матни талабалар томонидан ёзма шаклда баён этилади ва ҳар бир мезон 10 баллик тизим асосида баҳоланади (жами 50 балл).

VI. Ҳужжатларни тақдим этиш тартиби

12. Республикадаги олий таълим муассасаларида ғолиб бўлган, 1-ўринни эгаллаган талабанинг ҳужжатлари (ОТМ Ишчи гуруҳи баённомаси ва қарори, ғолиб бўлган талабанинг ижодий ишлари) вазирлик Ташкилий ишчи гуруҳига жорий йилнинг 25 октябрь кунига қадар 1 нусха ёзма, 1 нусха электрон вариантда (вазирлик ҳузуридаги Маънавият ва маърифат марказига Д.Абдуллаева тел: 97 149-73-10) тақдим этилади.

13. Танловга тақдим этиладиган мақолалар компьютер Word дастурида, Times New Roman 14 шрифтида 1 интервалда, чапдан 30 мм, ўнгдан 15 мм, юқори ва пастдан 25 мм жой қолдирган ҳолда ёзилган бўлиши ҳамда матнлар илмий, техник, стилистик таҳрир қилинган бўлиши шарт. Ижодий ишларнинг электрон нусхасида талабаларнинг ўқиш жойи, факультети, курси ва таълим йўналиши тўлиқ кўрсатилади, ёзма нусхасида ўқиш жойи, факультети, курси ва таълим йўналиши кўрсатилмайди.

14. Юқоридаги талабларга жавоб бермайдиган ижодий иш (иншо)лар қабул қилинмайди.

VII. Танлов ғолибларини тақдирлаш

15. Танловнинг биринчи босқичида юқори (1, 2, 3) ўринни эгаллаган талабалар олий таълим муассасаси томонидан фахрий ёрлиқлар ва қимматбаҳо совғалар билан тақдирланади.

Юқори (1, 2, 3) ўринларни эгаллаган талабаларнинг ижодий ишлари таълим муассасаси веб-сайтлари, газета ва журналларида ёритилади.

16. Танлов бўйича якуний иккинчи босқичда ғолиб бўлган талабалар Олий ва ўрта махсус таълим вазирлигининг фахрий ёрлиғи ҳамда қуйидаги тартибда пул маблағлари билан рағбатлантирилади:

1-ўрин – 3 000 000 (уч миллион) сўм;

2-ўрин – 2 000 000 (икки миллион) сўм;

3-ўрин – 1 000 000 (бир миллион) сўм.

17. Якуний босқичда ғолиб бўлган талабаларни рағбатлантириш Олий ва ўрта махсус таълим вазирлигининг Олий таълим муассасаларини ривожлантириш жамғармаси ҳисобидан молиялаштирилади.

VIII. Ташкилий ишчи гуруҳи ҳамда иштирокчиларнинг ҳуқуқ ва мажбуриятлари

18. Танловни ўтказиш бўйича Ташкилий Ишчи гуруҳи фаолияти давомида қуйидаги вазифаларни амалга оширади:

танловни ўтказиш тўғрисида қарорлар қабул қилиш;

танлов тўғрисидаги Низомни ишлаб чиқиш ва унга ўзгартиришлар киритиш;

танловнинг ўтказилиш шартлари (танловни ўтказиш қоидалари, муддати, баҳолаш жараёни, мезонлари ва босқичлари)ни белгилаш;

танловни ўтказиш жараёнида ҳакамлар хайъатининг таркибини тасдиқлаш ҳамда уларнинг ишларини мувофиқлаштириш;

танловнинг республика босқичига ҳужжатлар қабул қилиш жараёнини ташкил этиш.

19. Ташкилий ишчи гуруҳ танлов жараёнида қуйидаги мажбуриятларни ўз зиммасига олади:

танловнинг барча иштирокчилари учун тенг шарт-шароитларни яратиш;

танловнинг очиқ ва ошкора тарзда ўтказилишини таъминлаш;

танлов натижаларини келишилган муддатдан аввал эълон қилинишига йўл қўймаслик.

20. Танлов иштирокчисининг ҳуқуқлари қуйидагилардан иборат:

танловни ўтказиш шартлари ва тартиби тўғрисида маълумот олиш;

танлов ғолиби деб эълон қилинганида соврин(лар)ни ўзи ёки ишончли вакили орқали қабул қилиб олиш.

21. Танлов иштирокчисининг мажбуриятлари қуйидагилардан иборат:

аризани топширишдан олдин Танлов Низоми билан тўлиқ танишиш;

Низомда кўрсатилган талаблар асосида аризани тўлдириш;

мазкур Низомда кўрсатилган қоидаларга қатъий риоя этиш.

танлов иштирокчиси тақдим этган қўшимча ҳужжатлардаги нотўғри маълумотлар учун жавобгар ҳисобланади.

22. Танлов иштирокчиси ўз мажбуриятларини бажармаган тақдирда Ташкилий ишчи гуруҳи томонидан тегишли тартибда танловдан четлаштирилиши мумкин.

IX. Якуний қоидалар

23. Танловга келиб тушган ҳужжатлар қонун ҳужжатларида белгиланган тартибда 1 йил муддат давомида сақланади.

24. Танлов иштирокчиси (бошқа шахс) томонидан танловнинг якуний босқичини ташкил этиш ва ўтказиш, шунингдек, унинг натижаси билан боғлиқ мурожаат(эътироз)лар қабул қилинмайди.